

REGIONAL NEWS

HEADLINES

1. Dharti Aaba Janjativa Gram Utkarsh Abhiyan (DAJGUA) Awareness & Benefit Saturation Camp chu Mizorama chu vawiin khan Chief Minister Pu Lalduhoma'n a hawng.
2. Chakma Autonomous District Council a BJP hruaitu, CEM Pu Molin Kumar Chakma chu vawiin khan rintawklohna Motion hmangin CEM atanga paihthlak a ni.
3. Prime Minister Narendra Modia'n Cyprus atangin civil mi chawimawina sang Grand Cross of the Order of Makarios III a dawng
4. Sawrkar laipui chuan rampum chhiarpui Census neih tur chungchang hriattirna vawiin khan a ti chhuak.

<><><>

DAJGUA

India in kum 2047-a ram changkang anih hun tur atana hmalakna kalkawnga tribal mipuite zirtirna leh an mamawh zualpui pekna tura hmalakna Dharti Aaba Janjativa Gram Utkarsh Abhiyan (DAJGUA) Awareness & Benefit Saturation Camp chu Mizorama kalpui turin vawiin khan Chief Minister Pu Lalduhoma'n a hawng.

Planning & Programme Implementation Conference Hall-a DAJGUA a hawanna ah Chief Minister Pu Lalduhoma chuan hmalakna chu tun thla chhunga kalpui ani a ti a, Mizoram mipui zaa sawmkua leh pali aia tam chu tribal anni tih sawiin Central sawrkarin tribal te hamthatna a rawn duan chu state pumpui hamthatna a ni nghal tih sawiin State sawrkarin hmasawna scheme a duan pawh tribal hamthatna tur a ni nghal zel tih a sawi.

Chief Minister chuan sawrkar laipuiin camp chu tha taka kalpui a, state dangte entawntlak khawpa tihlawhtling turin an beisei tih sawiin a mawhphurtu zawng zawngten tha taka hlen theuh turin a chah bawk.

DAJGUA hi sawrkar laipui flagship programme niin a kalpuitu tur line department 17 a thlang a, heng line department te hian thawk hovin India ram tribal awmna district thlanchhuah 549 ah te hna an thawk ang. Mizoram bikah chuan line department 14 ten district 11 a mihring nuai li vel huamin khaw 383 ah kalpui a ni.

DAJGUA hi District hrang hrangah pawh hawn nghal a ni a, Sub-Divisional Officer Pu Ngulzathuama chuan vawiin khan Champhai District ah a hawng a, khaw 30 ah kalpui tur a ni tih a sawi a. Mamit District Bawrhsap Pu K Lalhlawmlova pawhin vawiin khan DC Conference Hall, Mamit-ah hawngin, Mamit district a khaw 57 chu he scheme kalpui tura thlan an ni tih a sawi. Khawzawl Bawrhsap Pu K.

Vanlalthiana pawhin vawiin khan Khawzawl DC office tualah Khawzawl District chhunga IEC Campaign on DAJGUA a hawng a, mipuite tana hamthatna an pek theih zawng zawng te a tam thei ang ber pe chhuak thei tura theihtawp chhuah turin sawrkar hotute a sawm a, mipuiin an tangkai puia an hlawkpui ngei theih a beisei thu a sawi bawk a ni.

<><><>

JAIL

Nizan dar 10 vela Central Jail atanga tang tlan chhuak, Lalthawmthanga (kum 28), Zonuam Veng, Aizawl chu zawn mek a ni.

Prison Department atanga thudawn danin, Lalthawmthanga hi Under Tiral Prisoner niin, nikum khan ruihhlo vanga man a ni a, Champhai District Jail-ah a tan hnuah nikum December ni 20 atang khan Central Jail, Aizawlah sawn thlak a ni a, nizan dar 10 vel khan blanket leh mau hmangin jail bang hungnaah a lawn liam a, tukin dar 6 vel khan a tlan chhuak tih hriat chauh a ni a, Prison Dept. chuan Zonuam PS-ah FIR an thehlut a, zawn mek a ni.

Prison Department -in a chhinchhiah danin, vawiin June ni 16 thleng hian Mizoram Jail hrang hrang 10-ah te mi tang 1771, mipa 1546 leh hmeichhia 209 an tang mek a, mi tang leng thei zat chu 1386 a nih laiin, a leng zat aiin, mi 623 in an tam a ni. Central Jail Aizawl, Central Women Jail, District Jail Aizawl, District Jail Lunglei, leh District Jail Champhaiah te mi tang leng zat aia tam an tang mek a, Central Jail-ah tam berin, mi tang leng zat chu mi 438 an nih laiin, mi 861 an tang a, a leng zat aiin 423 in an tam a, District Jail Champhai-in dawtin, mi tang leng zat 105-ah mi 218 tangin, 113-in an tam a, Central Women Jail-ah mi tang leng zat chu mi 96 an nih laiin, a leng zat aiin mi 51-in an tam a, District Jail Lunglei-ah mi tang leng zat 109-ah mi 20-in an tam a, District Jail, Aizawl-ah mi tang leng zat chu mi 90 an nih laiin, mi tang 16-in an tam bawk a ni.

Home Minister Pu K. Sapdanga'n nikum Assembly Session thutkhawma Aizawl West 3 bialtu MLA Pu VL Zaithanzama zawhna ziaka a chhannaah, kum 2022 atanga 2024 August thla thleng khan Jail tang tlan chhuak mi 56 an awm a ti a, heng zingah hian mi 25 man leh tawh niin, midang 31 erawh man an la ni lo a ti. Kum 2022 atanga kum 2024 inkara tlan chhuak zingah hian Aizawl District atanga tlan chhuak mi 8 te chu man an ni tawh a, Siaha atangin mi 6 man niin Lunglei atanga tlan chhuak mi 3 man ni a, Champhai, Serchhip leh Women's Jail atanga tlan chhuak mi 2 man tawh niin Lawngtlai leh Kolasib atanga tlan chhuak mi 1 ve ve man an ni tawh a ni.

<><><>

CADC

Chakma Autonomous District Council a BJP hruaitu, CEM Pu Molin Kumar Chakma chu vawiin khan rintawklohna Motion hmangin CEM atanga paihthlak a ni.

Chakma Autonomous District Council chuan vawiin khan CADC Session Hall, Chawngte ah, Chairman, Pu Lakhan Chakma kaihruiin Special Session an nei a, Chief Executive Member, Pu Molin Kumar Chakma chu No-Confidence Motion hmanga paihthlak a ni.

He motion hi Zoram People's Movement (ZPM) member, Rengkashya Constituency atanga MDC thlan tlin, Pu Doymoy Daveng Chakma chuan a pulut a, CEM Pu Molin Kumar Chakma hian sorkarna chelh chhunzawm turin member a ngah tawh tawh lova, hruaitu thlak danglam ngai a nih thu a sawi.

Motion hi sawiho nghal niin, vote lak a ni a, Session atel Elected Member 17 zinga MDC 15 chuan motion hi an thlawp a, MDC 1 chuan motion thlawp lo zawngin a vote thung. MNF, MDC awmchhun, Pu Rasik Mohan Chakma chuan vote a thlak lo. BJP hruaitu, CEM paih duhtu an tam zawk vangin, CEM chu paihthlak a ni.

CADC 11-na ah hian CEM a tan Pu Rasik Mohan Chakma lakluh anih hnua, kumin February ni 27 khan Pu Molin Kumar Chakma hian a thlak a, CADC ah hian thlantlin member 20 awmin, Member pakhat thita ai thlan anih loh avangin tun dinhmunah Member 19 an awm mek a, ZPM in member 16 neiin, MNF member 1 leh BJP Member 2 an awm mek a, BJP Member Pu Nirupam Chakma chu Session ah a tello a mi. Kar kalta khan Chakma Autonomous District Council huamchhunga tlawmngai pawl 3 te chuan kar kalta khan CADC chu thla 6 chhung Governor Rule ah dah turin Larsap Gen (Retd) VK Singh a hnenah an thlen a, Young Chakma Association (YCA), Mizoram Chakma Students' Union (MCSU), leh Chakma Mahila Samiti te hian memorandum siamin CADC buaina a thuk hle tih an sawi a, tunah hian sorkarna inthlakthlengna thleng leh mai tur khawpin boruak a inmun mek an ti a ni.

Term hmasa khan CADC ah vawi 5 sorkar a inthlak a, tun term ah hian vawi 2 inthlak leh tawhin, tunah pawh politics boruak a inlumlet leh mek a, hei hi MDC te chu chan tha zawk chang tur leh hnalak naah pawh duhsak an nih tur thu a thlem an nih thin vang a ni an ti a, Governor chu inrawlh thuai se an ti a ni.

Hei bakah hian CADC sum dinhmun chu a chhe hle an ti a, thla 4 chhung sorkarin hlawh a pe tawh loa, kumin sorkar kum kalmekah hian thla 8 vel chu bathlawa kal tur ni a rinlawk a nih thu an sawi a, dan lova hnalak hrang hrang te chuan sum leh pai dinhmun hi a tichhe zual a ni an ti bawh a ni. An memorandum a an tarlan danin, dan lova sorkar hna pek hi 200 a chuang a, hei hi kum 2022 hnua lak te niin hemi chungchang pawh hi chhui chian ngei a ngai a ni an ti. Lalngheta Ralte Akashvani News Aizawl

11 yrs MODI GOVT

MLA Dr.K.Beichhualeh Pu K.Hrahmo ten kum 11 chhunga Prime Minister Pu Narendra Modi kaihhruai Sorkar hmalakna hrang hrangte Siaha Press Club ah chanchinbu mite kawmin an puangzar a, he hun hi MDC Pu Delson Notlia BJP National Minority Secretary chuan a kaihruai.

Dr.K.Beichhua chuan kum 11 chhunga Pu Narendra Modi kaihhruai Sorkar chuan India hmel a tidanglam mek a ni tiin hmun kilkhawr bera awm Siaha District pawin nasa takin hma a sawn a ti a, Sawrkar laipuiin mirethei zawkte tana scheme hrang hrang a duante tha taka kalpui anih avangin mipuite intin ei leh in leh khawsakna a awlsam phah hle a ni a ti a, India zalenna kum 75 na lo thleng tur puala mi rethei chenna in nei lote in saksak vekna tur Housing for All te, rethei zawkte hnena a thlawna ration buhfai pek te, damdawi ina a thlawna inenkawlina pek te, lo neitu leh kut hnathawktu te tanpuina chi hrang hrang pek te bakah hmasawnna ruhrel bunna tur Special Assistance leh Mass Communication lamah nasa takin hma a la a, faina leh thanghlimna lamah pawh chak taka hma la-in rah tha a chhuah mek niin a sawi bawk.

DR.K.Beichhua, MLA chuan Look East Policy pawh a taka thawk turin Act East Policy ah a let a, Mizoram pawh inkalpawhna lamah nasa takin hma a sawn bawk a, tunah phei chuan Aizawl kawtkai-ah Rail a lo lut tawh nghe nghe a ni, a ti a, tunhmaa mi harsa zawk te tana sum lo kal, kawng laka bothlau a awm thin chu tunah chuan an bank account ah him takin a lut tawh a, a ropui hle a ni, a ti bawk.

Pu K.Hrahmo, MLA pawhin PM Modi kaihhruai sawrkar chuan India rama retheihna umbo hi a thil tum lian ber pakhat a ni a ti a, tun dinhmunah India hi khawvela ram thil tih thei leh hausa ber 4 naah a awm mek a, India-in khawvela ber ni tura a tanlaknaah keini pawhin kan tihturte rinawm taka kan tih ve a ngai dawn a ni, a ti bawk.

<><><>

NEET

National Testing Agency (NTA)-in rampum huapa undergraduate medical program zir thei tur a zawnna, National Eligibility cum Entrance Test (NEET), 2025 result a tihchhuahah Mizoram atanga zirlai exam zaa 51.42, mi 1243 -in cut-off mark an hmu pha a, kumin 2025 MBSE pawl 12 Science-a pakhatna Cynthia Lalhlupuii Shangpliang chu Mizoram atanga ti tha ber a ni.

NTA chuan NEET 2025 hi Inrinni liamta, June ni 14 khan a tichhuak a, Mizoram bikah exam tuma in zia kut, 2,552 an awm laiin, mi 2417-in exam hi an hmachhawn a, an zinga zaa 51.42, mi 1243- in cut-off mark an hmu pha a. Nikum NEET 2024-ah khan Mizoram zirlai bikah in zia kut mi 2,595 an awm a, an zinga 2,469 an exam a, chung zinga zaa 47.52, zirlai 1186 ten cut-off marks an hmu a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia'n Cyprus atangin civil mi chawimawina sawng Grand Cross of the Order of Makarios III a dawng. Pu Modia hi vawiin khan Cyprus President Nikos Christodoulides nen an inkawm baw k a. Chawimawina ropui tak an hlan chu lawmawm atih thu sawiin India mi zawng zawng aiawha dawng anih thu a sawi a ni.

Vawiin vek khan Prime Minister Narendra Modia hoin India leh Cyprus aiawh sawrkar hotute an inia a. Pu Modia chuan India-Cyprus thawhdunna chu democracy bulthutah ngeth takin a inthlung tih a sawi a. Hun tam tak paltlangin ngeth takin an thawkdun zel tih a sawi. Pu Modia chuan Cyprus Vision 2035 leh India in Viksit Bharat 2047 te chuan tum thuhmun an neiht thu sawiin kum 5 lo awm tura an thawhdunna tur ruahmanna road map siam a ni ang a ti baw k.

PM Modia hian Cyprus a tlawh hnu hian Croatia leh Canada a pan leh ang.

<><><>

ISRAEL- IRAN

Iran leh Israel te chu a ni li nan an la inkah chhonzawm a. Mitthi zat a pun bakah in leh lo tam tak a chhe tawh a ni. Puan tawh angin Israel-in Iran Nuclear hmunpui a kah vangin a chhanlet nan Iran hian missile tam takin Israel khawpuite a kap a ni. G7 Summit Canada-a neih turah ram hruiute chuan boruak a sosang zel ang tih an hlahu thu an sawi a ni. Vawiin thlengin ram pahni inkah avang hian mi 240 an thi tawh a, a tam zawk hi civil mi an ni.

<><><>

CENSUS

Sawrkar laipui chuan rampum chhiarpui Census neih tur chungchang hriattirna vawiin khan a ti chhuak. Union Home Ministry chuan inchhiarna hi Ladakh Union Territory, vur tlak tamna Jammu and Kashmir leh Himachal Pradesh leh Uttarakhand tih loh chu kum 2027, March ni 1 atangin neih a ni ang. Kan correspondent sawidanin Census hi thawh hnihnain neih tur a ni.

<><><>